

程
侍
郎
遺
集

程侍郎遺集初編卷九

歙 程恩澤 春海著

祭錢東生夫子文

於戲亹亹夫子敏穎超特文而又儒學統萬緒以蓄千
智未竟一夷旣泊仕宦復廉取名用晦而愚由壯逮老
彌衰彌健半苑半枯豫尅亡日經畫含斂招詢友徒豈
有所赴都錄雲台委羽遮須音徽未沫春蘭秋菊請陳
其靡夫子才捷文不加點成誦借書分占口授十手掣
脫乞姑徐徐千詩百賦子唾而就眾喘而吁博關典籍

尤邃鄭孔以經爲郭情律兒實芝菌虎龍灸景鍼芻閔
廓深遠百氏環橐九能大夫子嘗稱言經生偉人

昭代所儲薈萃著述錄采梗概以遺南狐學校壇宇治
課常變鈇析而臚子又稱言文蔽也雜詩蔽也誣和易
其體篤雅其節黼黻其祛圭陰江左謝華啟秀鎔一鑠
鑪欲剝橫流自守宗派以還古初子惠淵懿大直若訕
處愠以愉子識卓絕見微知著能斷且謀孝乎惟孝惓
懷故舊不遺嫺呱弗籍貴胄厯官清要屢持文樞沛然
其名上徹

帝所遠波扶餘使尙待用秉經達權可公可孤憶受知
始賞賦顏衿詡吟癡符風雪清華鐙火夜集輒言姁姁
情恕理遣標然靜雲覆四座隅十有八載半以睽離迂
以闊疏文藝寸長差可表襮子謹而與憂患疾痛無可
告訴子聞而呼旣畔函丈昔昔夢見猶憑竈觚歸拜牀
下秋疾來宅再革再蘇不計生歿遑恤貴富紛紛弄袂
君子所息全歸爲亟不墮歧途遺草一篋枕鄴所授弃
之瓠壺後死之責剗剗流布且鉛且朱龍吉化矣癯人
亡矣若津矢柎尊酒旣奠靈風颯然心光如珠小文謫

劣捧土益岱但形其飭有道之碑鄭鄉之業則俟大巫
哀哉尙饗

祭宋芷灣先生文

於戲太白一去大蘇不來天憫詩境夷於委灰公腹奇
氣如憑高臺西摘落月東浴蓬萊化爲明霞焜煌九垓
尋子詩境非蘇非李古與我合我不古儼超然之神萬
彙其始貌門麟觸霹靂操筆捷若天馬繁若媚子秋館
桂魄春筵綺花醇酎千觴老手八叉草聖詩王公侯咤
嗟今日聖牆明日籠紗零縑碎楮傳走天涯爲名翰林

良二千石才逸遇蹇卅五通籍使黔使蜀文路大關滇
官一紀寂寞懷璧觀察一稔卽削塵跡海內知己靡不
悼惜歎聲所到遂成今昔澤入芸館學宮體文教之誨
之伊子獨勤諒符而癡滄蘭弗芬人覽叱叱子覽欣欣
謂我古賦蔚跂不羣袖稿款客高吟入雲遂令走卒來
鑒大軍人雅重子信子所云子不惜譽溢其寸分我喜
且慚歸求典墳鄧林維流何處置斤子宦萬里我返鄉
國尺帛不達夢想卽得秋遇如約子北我北

嘉慶戊寅年公人都

澤亦入都

參軍之堂元龍之側之渙自倡子聽嘿嘿

時鮑覺生先生

設燕招澤趨陪座有陳伯雲王楷堂兩先生楷堂大聲歌近作公嘿爾而聽

燭闌尊冷珠斗

已仄送子上車微聞太息前此三年我使黔中子時在

滇音耗偶通子過且蘭

貴陽省城

訪我所宮我詢子詩垂老

愈雄我乞子書子曰遽勿我敏子政子謝無功我偵滇

吏述子之風灣甸有酋嘯聚羣凶肝人爲餉喋血成虹

武弁翼之利其賒賓大吏畏之恐衅邊烽子決殺之苦

無尺鋒上掣其肘旁縛厥躬子憤成疾勞心忡忡急練

鄉兵讐酋以弓卒剗其頭以祭沙蟲曾否若是願聞始

終子曰罷休此何足庸惟子宦滇美政够夥士歌民頌

溢于道左小飲一霎欲問不果會有玉管奚待瑣瑣我
移沅櫂子艤楚舸同居鶉尾乃迹蹠坐轉粟天溽風雨
坎坷歸乃疲茶四末窳惰遂令恆幹爲疾所禍跡子生
平大才觥觥文能著書武能將兵未罄所以詩文鳴
不撫所仕書曰有名神劍夫禱三軍不驚偶露其銖萬
夫失爭子詩子書自視甚輕棄其胥餘後學所羹頤碩
其貌蹙輔而笑穎邁其性言簡以妙似狂似慤能忠能
孝都不經意動中歛要天懷散朗或飲或嘯一錢不選
萬卷獨校我登子堂未見奧窔多別少覲遠邇相照會

不邂逅轉賀爲弔西愚傍徨如夜失曜江山文藻異代
同調遠致絮酒願子速醕靈遊靈歸不閤嶺嶠於戲尙
饗

祭家也園先生文

於戲有古豪傑起於新安天昌乃名不膺乃官少而通
籍老而爲客黃金山傾所至削跡早抱大志恥卑狹流
文章事功欲偃滄洲當其赴前不暇量力眾詫而驚自
顧甚得瑰意琦行珍裘玉輿神仙中人出入閭都獻賦
爲郎遂入樞密兩轉銓署屢讞刑律英簫所指曾雪厄

冤亮節清風卻賄與援熊湘戎事枕戈磨盾護麟符旋
左虎右隼尋其才望指顧九遷忽漫投簪弁九歸田進
避權相成我高潔退澣厠愉二老歡悅封公雄卓其施
恢恢公纘厥緒屢千萬開銅陵金穴非家所有揮霍在
卽邊計其後窮阨俵俵來斂公門屢貸復貸公顏益溫
生死患難錢通可轉論公所挾積無量善尤愛端士與
羣雅材旣贍其身復廣其栽公性華逸詞翰俱妙壺輜
一巡絲管竝叫意錢博塞反雉掬魚脫手忘懷舉手笑
呼若公若侯皆金石友卽潛京輦四海趨走公不慕勢

人爲名高息影江湖冠蓋滔滔筵芳友萃筵冷友散再
衰再盛哀樂參半晚學禽向與陶朱公逋負益多食客
益充吳楚遊倦遂窺海鏡粵都奇麗雅合公性瘴天如
瘡匪衰病宜淹忽長逝愴矣其悲我祖高足我父至契
我生公賀宦邸連砌我戲鳩車公授我書公賙我家公
糴我裾乾蔭旣失奉母南返我祖悵悵公語款款祖庭
又殂母憐其孤公曰勿憂此子易扶我年十七卽學公
字與公仲子鉛槧樽俎我文無范公誠其馳敏而運鋒
公歎其奇我屢計偕公客吳會不第公愕旣第公快我

素食貧奔走阻艱公泣公歌天涯水干別或數載聚不
三日念深緣淺心勞夢拙昭陽協洽我使且蘭逢公新
鄭大河漫漫玉骨鶴聳雙眸鏡徹語多恆昔腸老愈熱
夜半涕下曉來北南人語喧豷四目耽耽我黔而湘公
楚而粵風聽多阻書問亦闕公之貺我山海難量豈不
思報抔土太行金河以南別竟永訣五嶺以北苦失消
息出處大節公無少虧不附勢要而戀庭闈使公徇祿
久躋大府定建宏偉龍文虎武公施旣博不責人酬酬
者寥寥天道悠悠慈仁義勇筆不勝紀散在人口著必

良史公有三哲屢諫公歸仲也最豪博辨知幾公志未伸當有達者我拭此目以俟方雅絮酒磨鏡未能親行哭寢有淚激爲楚聲光孝鑒師華首葛老求公於是公跡未掃於戲尙饗

祭葆逸舟觀察文

於戲國隕良士家失長者問天茫茫導以猶子從以懿况君丁厥殃程書旁午讞牘未了燭難心益仲兄大賢痛失白睂老淚萬行黔婁有妻伯道無兒後塵痠傷君以孝廉由國學師爲禮曹郎觀察東南亦習臬蘇亦宗

研桑際鹽法倣

帝命璽吏改弦更張鋒車星使反覆詰難君言甚詳鞭
笞旣得錢流地上利歸海王

帝嘉君賢移節歸綏長城巨防往者辛卯歲乃大水漂
朱雀航沈竈產龍萬民泫泫牽船望洋君勸輸粟彌夜
達旦舌焦脣創抑鴻濩災誓波請命民用乂康改秋試
期士得平土不蹙潞唐凡此美政大府俞之君實紀綱
我爲寓公見逐波臣舉室倉皇君儻華璽妥我驚魂度
我巾箱旅客多戚君左右我使登遠莊我性狷介曲意

相喻婉辭而臧紅鄂破春素月行秋山明水蒼君歌我
呼連輿接茵窮花竹鄉一味之甘十漿之饋必分而嘗
送我北去天酸然雨離雲滿觴睽背二稔君來

觀宸五柞長楊直廬岑寂溫酒相勞有鳴寒螿君顏益
豐漆髯飄蕭甚口琅琅重話舊遊萍散蓬轉感時懷愴
謂君邊寄建樹必異克柔克剛君言南中風物清飭每
飯不忘西行索居黑水風急大青雪荒計抵秀容卽攝
廉使其真未亡何來惡耗何疾疏痺何藥披猖走告諸
爰諸爰詫疑瞿瞿俛俛君性篤摯情懇德滿薰然善良

世宦熏灼尤所吐棄藐以迭邊訟庭花飛忽致雙鶴環
君舞鵝周妻何肉俱可屏卻矧曰霓裳揣其襟抱清超
曠遠宜壽久長視官甚輕必能宏濟爲儉歲梁胡天不
愁折婁貞公悼盛孝章拙篆帖楹君所欣賞焚之陰堂
小文舛陋庶無愧辭聊申闡彰數耶命耶靈其自知無
任涕滂於戲尙饗

祭外姑劉太君童太夫人文

於戲痛哉二日不見疾來如風不語不食僵仆籠東胸
蓄萬言口無一字百呼弗荅瞠目閣淚喉森莽蓴半體

遂枯心光熒熒乍有乍無投藥不入抵壺而嘆行就長
夜何術使旦遇否身泰節苦境旨反覆不訓孰測其理
請述母德孝於病姑姑臥三載昔昔爲奴以手掬穢以
口哺糜頰喏卽膺頤指斯知姑曰孝哉有婦若此願爾
女貴得壻如子先是外舅抱疴不斟金翦截膚石跳煎
心肉徇九原痕留一割若有所待隱忍生活時女未睥
未睥而孤卻顧女君亦腹文珠入地求亡祝天得雄兩
念交馳魂夢洶洶子羸女壯母意悵惘均乳而食冀子
速長嬌穉多青幾赴殤宮就溼推漣保此阨窮家祀薦

時女君所治佐潔蘋蘩季蘭尸之千劬萬辛歷廿餘載
自後追思若涉淵海男賦綠衣旣授室矣女卜鳳皇追
其吉矣孰可壻者母心傍徨擇到黔婁不棄侯光新婦
來歸我母悅喜謂秉母教婉孌循禮母與我母雅故旣
久申以嬾戚益相人偶槐榆橘柚合爲一家同上錦車
共走天涯黔雲漏雨楚風多暑我母慰安恐母意苦我
母數疾殫殫不支婦力弗給母能維持我母感母若姊
姊然朝怡夕嚶若蛩蛩焉我母綿惓呼母絮語我兒我
婦卿子卿女慈暉徂謝阻艱南行我咽我吽母止我聲

我毀我蹶我鬱我戚宛轉相我老淚潛滴母家雁門風
高折弦不耐溽蒸愁縛疾纏亦既北還一屋爲笑後堂
置酒子舞壻蹈玉雪諸孫或戲或謔梨栗繞牀輒語歡
和愧非韋皋謬荷嘉譽亦效稚恭騎馬稱遽健婦夫半
直廬雙栖偶迂母軒藥沼桃蹊舊患漸痊常膳載進壻
階驟轉母意深慶尺五城南連宇接萌往來憧憧如一
團瓢經緯周緻庀我家政先人後已革裘崇正雞鳴膈
膊烏尾畢通簪短帶長檄揭且瘖鏘籥如珮篴篴璫璫
施杖安枒必得其所識惟卓犖性復卹賙散環拔釵以

惠惇嫺昏黃燈火時話曩昔金張門第貂珥盈席外舅
雅性能續能琴母通弈旨亦解弦音投枰棄軫舊跡如
掃息古井波種拔心草施藥拯急已疾曷瘳乃圭不聊
天道悠悠有孝者子事庶如嫡知母乳味悲母瘁力晝
夜不眠求醫籲天增惶女癡繞柱而旋秋孟十九斜月
在屋紈如一鼓婦孺咸哭年齒未耆旌封尙虛德盛運
促慶遺子帑事起倉卒我懷怱怱謂母尙存誤斂母闔
母憐孤稚安忍棄捐西風觸魂當亦潸然構疴彌酷繫
思彌永來日大難不盡哀哽於戲痛哉尙饗

祭吳蘭雪先生文

於戲有美一人起廬鄱東以詩而窮以詩而通卅載大名海內拜風萃古今才擷其妙空清若浴碧冶若寢紅能剛能柔且逸且雄雲錦鳳羅天巧國工綺歲高步秀鹽玉頰歡場醉筆驕花寵葉解佩漢神躋柳佳俠連手縈繞願執巾箠上公通侯以禮爲羅入拜後堂出聯玉珂華天雪宵奇峯詭波眾摹難工獨聆君謠神畫僧繇曼聲韓娥一座盡傾萬本萬螺或寫宮統或織鉤窠零句碎章口熟巖阿曰竝世生柰此才何亦登遴選亦舉

廉孝薇省端牘露門司教性非坦率遇每瑁璫超超阿
龍豈半袁豹斯人蕉萃識者私悼君懷豁如意不戀嫪
其境彌窳其名益噪中山弟子擁書請造扶餘使臣聽
詩踞竈聲譽文繡焉可戶告沛然有餘如響斯報
前賢壇坫稱尊大波小瀾關學者門屢屨其間君開緒
言同調蘭朋摩宰鯨鯢指窮爲薪似續斯文及君牧邊
投老荒屯四海盟雨凝爲鬱雲槩敦蕭寥非君樂聞我
齒廿餘邂逅長者見我塗抹詡以揚馬詫我博辨譔以
終賈我詩舛律萬言灑灑拜君指擿裁僞親雅精心銳

力奚事侈侈杜韓難真漢魏易假曰才學識獨具陶冶
我名未顯君乃大評袖我拙草投人夜珠强聒使聞或
否或俞我踐華近託於屬車君窺燕閒自佩一壺詠調
醉歌月墮星疏我感白風君助我吟我購鸞膠君貺以
瑜我時奉母握衣趨隅君遣魚軒蕙言姁姁珍膳甯餽
必薦鯉鳧我即使黔客香棠館曾書寓君吾見亦罕君
後牧此柯古香暝對花豔豔得句款款荅曰築巢以寄
漫嬾由黔使湘由湘北返別君六載共歎晚晚慈暉隕
矣叫天莫回扶引南舟炎暑怒雷君送我行蕭寺夕來

坐不忍起語不勝哀僧揣友情亦佐嗟嘆冀訂後約何
年何地遂成長訣豈所逆計庚寅之春君赴所治颿拂
吳會屢遣詩騎我客白下命駕未遂此後五載若背風
翅夢旣艱到書亦尠寄聞君措施大有賢聲千室鳴弦
百夫得情文黨設堂龐參卹嬰敦厚溫柔詩敎果行命
不龔黃壽或朏鏗吟老益工弗令吐傾梅景蓮花齋返
蓉城君福清逸名山幾遍滌筆匡瀑大雲菴硯久宿江
洲梅月如練有隨清娛玉貌盛鬢郎吟妾繪淋漓東絹
惜哉早化如露如電昨接手畢深慨杏殤一官瓠懸萬

緒茫茫我徒依君曰銀河張惡耗遞來謂君坐忘懷任
彥昇哭盛孝章名輩漸稀詩道其荒丹旄東發久澌塞
旂靈娛或來垂帶相羊天末故人泣奠一觴君知不知
憑此心光爲傳志銘後死所詳麤述大招臨風慨慷

祭曹文正公文

於戲元老耄嚙夙夜盡瘁心景其淪

帝乃震悼曰腹心賢曰股肱臣前此數日猶奉

尺一劄劄恣恣如何不憇精爽銷微寂無嘯呻月正三
日李將旦南有聲鏗訇公歸上霄朝野皇然失一正人

泉蘂之衷灼知惟

聖篤信惟

聖守道不移心無偏曲

特諡曰正伊公學術本末鉅細一主於敬懷繩準鉤執
符明燭亢鋸之柄顧善韜晦不露崖岸莫克窮竟惟

聖簪之獻可替否昭鑒而諍兒和辭訥不語不辯粹然
雅性惟

聖覺之弗辟嫌怨專抑浮競

明光若禔奉魁承杓十有五年參贊

席勝縛渠龍沙圖像凌煙簫勺靖矣動合機宜山陬解
壘練習掌故覲畫清靜大猷炳焉一覽僂記至耄彌彊
封章委闕雞次艷如占對不窮

皇心慰旃依之違之左右綏之以壹衡懸無笑隕迹無
激揚語而能得賢頻頻鷁斯求比求繫望風而還端委
立朝正容悟物中外肅然身仕

三朝徧厯六官相廿三載以文起家以惠濟美以才展
案羣經背誦諸史括記體用攸在篇筆醇雅弗睽時好
聯鼓貫珮最樂商藻齟齬隻字夕炬起改誕章誦觚鬼

瑣回穴謝以不解五典春官十持玉尺金鑄四海方聞
槩人趣公所尙咸入模楷文軌旣正道源所繫以建真
宰惟勤故敏惟儉故廉惟幾故深尤慎操履舉無口過
靡瑕可尋時際

堯舜寵重恩厚鑒此盡心公益奮厲深援安危思融古
今一言一策未緒未達反還酌斟條宜事比必聿必繹
犯星以齡惟

天聰明惟臣莫及敢竭斐忱綿悷之際猶念朝政誦誦
不禁

溫綸擢申任子增秩公感何若經被覆躬珍玲親體公
慚何若

親臨未臨

天意愴然

遣奠三爵留此耿耿眷顧愈厚思惟莫度歎聲所屆爰
自廷府以馳荒朔曰社稷臣百齡何恹九京可作公於
先子結肺附契爲金石盟我辱公知于彼生初先試啼
聲婉孌近親崇重道誼相胥而成不干以私不逢以喜
愜公素情悠悠蒼天栽植之力推置之誠亦旣孟晉曾

不計酬抔土太行師哉師哉桐子謾訑曰卽陌傾憶公
溫溫若氣之春百昌咸起去尤見思若燧厚夜若筏困
水生加太傅歿謚文正哀榮極矣靡不撫慟靡不賙襚
自

當宁始功著旗常慶流苗裔神在典祀大文清詩雉雉
麟麟充棟盈几千載而下測公笑兒惟憑故紙椒漿空
奠齊衰不御悲哽曷已靈風滿旗大星如月公其格止
哀哉尙饗

祭曹文正公德配劉太夫人文

於戲文正返真甫祺薦常柰何斗嬾冥隨隕光亦有少
室峯殯尤亟逐岱雲化距四挾日月穀歲旋哭寢者三
藉謂純終送者曷堪惟我女師婉婉德象以節度息作
嬪丞相爲曹大家爲劉令嫺明月采筆天風佩環節度
偉人母乃馮媛孺梁禮教廣聞深見左右文正垂五十
年黻佩有道海內稱賢綠輿在門黃裳之偶大帥竿牘
望而卻走闕觀狐趙山公之妃辨才與量識幾燭微詎
特內政修尼井井亦轉風化亦賴戒警先是司農奉九
旬慈春暉盎壺大雲覆之母以孫婦逮祖姑事頤指目

潤動輒承志戴星劬劬煩攪織紉孝溢邨譽喧傳迄今
我嬖倪時隨母拜母繞牀漿杲嬰春消九我母契母歡
若後先傾吐肺附情緒眇絲載乖載合倏哀倏樂我母
前逝母意殊索我娶於金繼室以劉母甥母姪唯母喫
咻絳帳生徒後堂弟子師恩母慈涵泳無已受性寬懿
秉心慤勤不貴華膺獨崇誦芬通知大義亦文亦史蘊
才不露愈褻淵嫩金幹玉楨八爵九華興慶首行榮顯
莫加蘭時內集屏謠深燕林林蘭玉雍樹負劒族姍燁
爍羨母福完祝句母福百分一端母曰茂哉細撤錫類

宜勗子姓以紹門地善容仁氣藹如蕙風旁颺曲吹感
及媼童鳳靡鸞鏤中懷茹苦筠心瘁矣豈待淮雨尙憶
昨冬計及崇祠師人賢良母實尸之無成代終賴此朗
識警欬在耳若前日事師未卒窆後母歸乎春水方生
又送靈艫惟子孫曾彌賢彌俊足慰慈望金策玉印念
及小已於真冷時哭奠椒漿靈其鑒之哀哉尙饗

公祭李蘭卿都轉文

於戲鳳集彘華海內文明所過謹諄願聆其聲亦有神
驥力竭猶騁仆於長坂見者哀哽豐遇嗇筭逝哉天聽

夫豈偶然抱道翊聖君如鄴侯如員半千生而慧成幼
卽頤天千詩百賦借書于手文采必霸歎欲萬有掇取
顯第若探筐篋抑然自下不侈形謀厯涉華近鳳閣樞
垣黼藻卿雲懸河筆端益習經史通知時務雷聲淵默
攬轡四顧成君盛名則守思田如搏丸泥指掌方圓以
渠龍骨則稻再熟以典雞次則戶勤讀百鼓統統盜革
而徂萬厦潭潭士晏而儒始是瘴深不覲驄馬父母在
庭瘴亦消治始是咫聞耳塞目習良師導源見學海瀾
貿貿提陀精夫媿徒養印自充仁偃禮趨銅鼓應停鑢

礮錯采陽明再來辰在戌亥悶古阿嬭陽明再來具開
創功惟天下才展君領聞則權巨關舶艤子徠鏡燭吏
姦決鴻害稼臥隄請命君盡止之弗啻奚病湖波寬緩
堰虹穹然全生澹蓄蟲人萬千權臬平亭掾荒如火種
種不齊生計遂左一歲再藝見賦吳都爾則聖土吾能
障湖柰何賦重生金生粟圖始實難試視粵穀政和特
達有遄其遷都轉山東借寇潁川平江練湖俟君盤錯
遂羈淮海紛攘六鑿百齡俄頃牙淺弦疾心光如月已
迫消乙君常稱言以古爲師破萬卷書實爲政資朕黨

儒效居此性真先教後刑厥化若神君樂山水驂鸞跨
鶴舉帷清暇觴詠閒作江淮東滙方聞所都偉哉主盟
比韓歐蘇憶同譜歲君甫十八外溫內服丰儀俊拔二
十歸娶花月萬篇廿三典試章貢多賢強仕過三如日
方中好作功名圖廖卜熊未聞臥疾遽卽長夜天球中
碎國棟折下翹想舊部哭呂衡州橫江迤南溢湘灘流
悲感所集定謀尸祝殤爲貴神上動琯宿著作藏山喆
兄哀之身後千秋營魄戀斯椒漿泣奠銀灣側畔靈風
肅然助我三歎哀哉尙饗

大清武德尉四川建昌營守備王君及其子武義

都尉貴州思南營遊擊忠節誄

并序

乾隆三十二年四川建昌營守備王君呈瑞偕守備馬子健隨遊擊蘇爾相素克津泰入緬責貢以降聞於朝於是藉武德家獄其孤宗佑又十年遊擊蘇爾相遁歸白其事於朝曰蘇爾相囚素克津泰縊王呈瑞馬子健死于江皆不屈也於是官宗佑以完其家實爲武義君又十八年武義以清江營守備將兵黔楚間當苗眾始立功尋以都司將兵剿教匪于蜀以遊擊將兵靖

永綏又從征興義苗平之勞績無筭賞賚無筭然寢食
戈刃閒凡三年裹創吮血虐以寒暑病歿死不支未嘗
一日休也嘉慶三年七月四日武義在蜀營攻王三槐
于安樂坪大軍失利提督死武義收散卒以寡搏眾身
被數十創力屈伏地北面大呼曰不能報

君恩矣遂卒於陳于是武德以忠節殉于緬其子武義
以忠節殉于蜀前後聞于朝大白于天下嗟呼奉使
貴不辱命降不可也雖不死可也使武德不死與蘇爾
相遁歸雖至今存無益也武義艱于獄勇于陳屢立戰

功富貴而雍容雖白首統戎行可也然觀其戰先士卒
篤病不少懈其心以爲彰前名報國恩出萬死不獲
一生可也夫忠節天之榮名也其父取之其子又取之
奉使臨敵人臣之大端也其父緬頌之其子蜀頌之太
平之時而以忠節著尤不易之遭際也天何厚于王氏
父子哉武德故黔人官于蜀遂家于蜀之西昌武義官
於黔葬於黔復家於黔之思南武義子振基廕雲騎尉
清慎有家法介安化令朱君以文請澤謂兩世忠節宜
誄也其辭曰

武德矯矯握節不屈魂趨金沙心向丹闕萬里孤臣不
求人知忽暴于 朝天實爲之孤臣有子不絕如綫拜
恩儋爵臥戈枕劍凡師之捷在義與勇武義一呼兵躍
馬駭首首獲魁積甲嶙峋武義顧之

寵賚又新先登陷陳病困不已生爲國士死乃肖子金
夷重夷有肉若糜血碧蜀天化爲虹霓鬼雄南驚直叩
阿瓦歸來歸來同食方社

卹酒載清豐碑峩峩忠乎孝乎所得孰多朱波獻象岷
絡如井如何琅邪不幸斯幸烏江熊熊掌溪來同忠孝

之廬千古以風

王母朱孺人誄

龍憐之孺未逾半稔而孺人僅三閱月也孫環之寡先
喪厥姑而孺人泣三喪以血也任妻之少孤孩在側而
孺人若流星之忽也然無子而有子子立而家庇抑何
慈且壽也畫室而處瓶口而對靡不禮以節也閨門雍
雍內外斬斬族媿悅也曰奚自奉之約而與人則周緯
不恤也穀似孝慕我友王華字石甫以淚泚筆寫老銀而摧切
也我居望室未表母德叫蒼天而罔極也

祈晴文

道光十二年六月十九日廣東正考官程恩澤副考官
邢福山爲久雨祈晴事齋肅頓首致禱於所過名山大
川之神惟貴神膺沈穉之盛典董常羊之巨維卷豐隆
於掌握起萍號於呵吹故能沛百昌之沃膏興五土之
熾苗今者小暑以後高原旣滋非惟雨之又潤澤之淺
已徵乎上尺下尺深復逮乎六施七施儻霖霖之不止
轉損穀而壞粢非所以體奧苑之仁覆錫富媪之蕃釐
也矧使臣者奉

天畀之英，錫併晝夜而載馳，歷五都四瀆而不憚險遠。且欲度粵嶠而南，窺珠海之麋，迫有程限，不可逶迤。頃行抵河涯之間，閱數日而爲積潦所羈，縻變小澗成壑，淪化平涂爲險巇。馬十步而九蹶，僕前進而退，疑廢食，飲而忘寢，興會不半程而已。茶疲噫嘻乎！雲將雨，師豈不屑使臣而爲斯？使臣官不足重，材不足毗，特恐淪薄海。

共主之簡命卽

貴神亦以爲非宜，伏願速偃雨旆，迅收雲旗，消芒晦于

俄頃顯鼂暉與夕暉使臣御風而行晷刻不差納節之日五善周咨是時覩大穗興長桐亦尤後而登京茨則貴神一舉而兩美備矣使臣當九頓首而謝如天之祺

第二次祈晴文

某等前次祈晴僅告所過名山大川不敢致禱天神以天神尊貴非大夫所當祈也然春秋之義王人雖微序於諸侯之上卽行諸侯之事不爲僭茲再禱風神雲神雷神以達寸悃恭惟天神宰制陰陽迭用柔剛曰雨而雨曰暘而暘今者二旬不見皎日厥咎常陰厥過流淫

瞻彼大田其患惟潦哀我征人復仆于道懷私爲每此
懷非私瓜時而往瓜摘乃遲使臣之心曾誓河水斯文
未喪宜受帝祉帝祉伊何所助者順霖止潦清乃利于
進伏陰伏雨有干赫曦孰綱維是而令怨咨仇夫雖微
會拜

帝命惟神聰明有籲必聽

謝開霽文

夏閒過宿州值霖霖不止作文祈晴於所過名
山大川之神不二日而開霽茲復過此作文祇

謝焉

翳使者之南邁兮值霖霖之淹旬懼程限之孔迫兮路
坎輾而逡巡乞明神之嘉惠兮叩喬陟與齋淪惟濯靈
之桴應兮發勁颺於九垓耀赫曦之烏羽兮卷水雲之
魚鱗前金蛇而後玉虎兮皆遁藏而不敢伸譬震怒而
忽霽顏兮非神力其孰振喜征益之不濡兮快劇驂之
可循爛川涯之媚晴兮斂山翠之久顰幸數日之偶開
兮恐後途之仍屯何明威之廣覆兮隔千里而一均計
自淮甸以達海壖兮無怪雨之或津頃使旋而納節兮

邕周原之駘駟過符離之古城兮心惓惓於貴神忱止
寸而恩倍尋兮雖巧言其曷陳冀蟲鳴而天聽兮藝真
香以上申

程侍郎遺集卷九

譚瑩玉生覆校

程侍郎遺集初編卷十

歙 程恩澤 春海著

曹太傅相國八十壽文

聖天子御極之十有四載時聖道淳六寓晏然仕歡於
朝農抃於田於時我太傅相國老夫子位台鼎凡二十
二年領樞密凡十有五年而齡躋八豳丹顏而華顛天
下望之如周召公如古彭篯豈不以身繫社稷之身齒
冠中外僚采之先故介福者同辭而冀劭德者彌堅哉
聖天子嘉乃元老訐謨丕績

親灑丹毫

寵以得賢之章

書額書楹祝期頤與康彊

大賚珍異器重衣華金朱煌煌若湛露之滋鄧林赫曦
之耀扶桑宜其奮榮揚輝日引而月長也十月幾望歲
星在畢五老人正中

天使乘雲繞月而來賁乎公之宮南面磬折祇述

天顧之隆公九頓首九命茲益恭捧盈而躬躬自上公
通侯九卿以迄庶官弟子門人莫不觀盛禮而忭寵崇

也酒行樂作或舉觴而言曰自某處公門下見

天使凡三至焉歲在甲戌公六十壽拜

渥恩於逾格實臣工所罕有歲在甲申公壽七旬如初
之禮卽肇今之辰自今以始且屢荷

天之申豈云

三錫而未之前聞哉故語

體兒之隆則

玉瀾繪像

宸章鐫焉

紫閣圖勛

御贊縣焉青花龍尾之道易腰輿以肩焉舉輿服之貴
則翠羽吉光重暈圓焉乘馬吉黃紫纁翩焉其它殊恩
異數玉管不勝編焉盡推致此之繇以諷乎座賢或舉
觴而荅曰公以世祿鼎貴致身清要詩禮之氣益乎廊
廟書誦三篋而不遺一字文約六經而下筆典故抑謫
觚之說詞倡和平之雅調用能潤色鴻業概括雄泉是
以玉尺凡十一持而五典春官門生遍海內皆酌公之
辭波而不敢溢其瀾至於總籙館裁

史宓領

東塾直

西清掌翰苑則杼揆天之藻侍

講筵則聞說經之聲而贊機務之要尤爲

絲言出納之所程是則公之鴻才蓋濯乎銀潢而愈明也公徧歷六官六官之職皆舉謀謨密勿千端萬緒若經緯之在杼

皇武旣布干羽屢舞上安下禔各得其所且也公昔以參知政事未三日而拜真相今也

加太傅崇銜冠公孤之上荷

三朝知遇之恩協百僚多士之望然則公之鴻才偉略其可度者在守正持重其不可度者則密對與

帝貺也然而智蓋一世材總四海名宰相之才也略也其本則基乎德公抱忠孝節廉之資以敬儉讓容爲之式少性恬退絕權貴之謁長益勤慎勵堅貞之節事無鉅細一主於敬閭室不欺若對天與聖平一己之好惡以齊人之好惡故有公非公是而無私喜私怒不激不隨一趨一步摧黷機於將萌培元氣於已固能使于于

者視端行正來同我蕩平之路也以儉表率非它一家
以讓風世自無人加故實是咨聞善拜嘉仁氣煦言如
春在花以是服官垂五十年無纖毫挂於過差尤可異
者聰記彊識善斷與謀深自掩抑如被褐反裘卓識遠
慮洞微燭幽載其清靜而廟堂旣修惟

聖天子察其單心許其同德

獎以正人覺試之而愈優祇之而愈新故

寵眷稠疊不可涯而祿祉履戩以莫不臻也加以耄期
守學彌敦攝固不懈以久建九紀以立純德以上登旗

翼之壽晉語云惟德厚者能受多福揚子云壽可益乎
曰德是則備三達尊膺九五福其爲德之固乎內教修
舉子貴孫賢其爲福之藪乎合座乃舉醕而頌曰古我
睿聖武公年九十五猶箴傲於國屬誦志之我補亦有
甯川羅侯領三十六曹年百二十猶精爽而不憚勞亦
有潞國太師年九十餘尊德樂善雍容玉除願公勲名
婉乎潞國壽考齊乎甯川而持盈挹歆則如睿聖武公
益耄益虔也

王子吳鼎匱銘

虎阜寺寶王子鼎吳乘失載訪者梗程孟聞自梁子偵
洪季陳仲據几省古翠欲垢灰未冷捐灰滌翠吐金景
梁子且詠且話訂龍龕攝提斗子柄陳仲作闔閉深靚
作銘者仲篆者孟王子有知定首肩

面東西晷銘

此器初於齊太守彥槐張大令作桺然自午初至未初無景是一大病因

與吾友鄭浣薌謀而補成之

非鏡非臺器圓靜節綫畫刻畫以銑欲平其地足仿鼎
可升可降極度等東表東景西西景日中無景何以省
乃規缺月弇其頂頂有小竅透光罔方中方睨定俄頃

槐杙所遺裊而整

爲張石洲篆薦雷書屋額并系以銘

洊雷之洊無不載洊至作薦于所會通震以坎皆詒再
恐思修省乃得貝文孫識之祖誥誠

晉靖王寶賢堂硯贊爲張石洲作

辦厥首印不辦厥足盼率然蟠朽蛇以齡身流水有光
宜受別墨之黔吁食其墨則贊三兆吐其墨則挾聯藻
無煇黃之祓而有草元之擾清事賢邸弄以密銀河張
宿寶其出甲子五光今再見天日

祁淳甫食筍齋圖記

南湖之北樂泉之西有食筍齋焉不由旬廣而幽徑窈窕無辨華飾而洞室燦閬雲歟西東山影黝庭月貫表裏水光鏡戶加以來風防露翠溼暑人之裾冒霜停雪碧成冬士之屋小堂佇軸文石如掃得非李藥師所問訊王子猷所嘯詠歟時則有尙書黃夫子承北門之旨緡東觀之籍羔羊委蛇魚鳥聳耳植援激水編町成篁酒澆籊籊之繡墨寫升斤之影蓋十餘年而竹以森焉亡何尙書請老衮衣邁歸學士其興簪筆能舞良夜成

韻則犖然當心曾欠競羶則率爾步往或擇迷醉而補
植或見復絳而翦拂荏苒有年而竹復茂焉且夫詩詠
筍菽禮重蒹葭浮亞之旨可珍日華之胎以瀹羊奚不
簞毋棄青甯此本義也八十之策乃滿爰所爲兼兩之
載亦汗青是削齊簡曰等讀書曰籀靡齒不傳搜之羽
陵此進義也尙書味道得腴學士食字而化波瀾莫二
屈屣相仍洵可謂水有異味識張陸之曾居舍開三徑
待羊求而沓至矣况士林之館藥院之廬樹分五柞之
蔭泉挹九成之醴孰謂是竹也非浮筠之幹截之仙山

嶰谷之產集茲鳴鳥也哉澤十稔移中三宿桑下昔栖
西舫今作東鄰猶憶尙書居此齋時展瑤局開芳筵縱
露初之觴發華始之詠錦被之策不嗔宮袍之奪必賞
今則叢蘭之宅越在天末王室之弭懸乎夢想懷遠感
舊我勞如何幸也其替人則黃羊大夫其轉徙則碧雞
才士也說者乃曰官廨也蘧廬也自有此屋厯有多賢
奚視爲甘棠之宅作爲瑞室之銘乎然假之丹素不能
壽其狀形之歌詠不能寫其神則無爲貴知矣故疏房
櫺貌不必一再居冠倫魁能不必先後聚碧鮮玉潤不

必月日蕃圖之詩之雖風牛異轍歲節殊候而一弓在握卽千載猶面也則謂此圖爲藏山之臥遊澁懷之故事也奚不可

任階平太史寫經圖贊

并序

階平先生博關羣籍江膺衆言旗角繫鈴已踐舊夢樹墨記柱尤傳家苑惇愛經典勃宰故訓以爲巾箱之妙非賀玠所識蘭臺之私必中郎乃徵粵自開皇廢像長興雕本人無書掌之瘁世乏壽胸之雅况血剖易滅記珠難索天口聖譯日付苟簡良可歎也於是久鈔雪纂

蒲荒柳剝隆古言凡之概方聞申難之喙一經寫定盡
歸默識爾乃龍伸護屈爛今典寶之奇紂紅許綠栞諸
虎帝之躊蓋惟用志不二故能與皤然者爭年課功必
藏故能與齟然者比遇柳氏自備古美其稱雲禎細書
今尙未輟至於給五千番之麻紙以招俊乂酬十五年
之嘉績用錫金紫則稽古之榮諒不越習者之門也爰
爲贊曰經紛綸兮井大春心若醉兮手之鵲是副墨之
子兮是雒誦之孫

藤花吟館記

藤花吟館者梁茝林方伯少時所觴詠地也楸槐貴里
檉柏小眠元瓠屯雲之勝屋山隨月之讀墨雨所瀋池
飛墨蛟寶帚所彗牆剝白蜃鏡瀾倒檻聞策策堂堂之
聲蚪柯負宇作瓏瓏疊疊之狀宜乎雪松久埒沈東陽
撫之長吟晨霞采鳳李贊皇思而寄句者也亡何西向
一笑東轡遂荒禮星師子爰題秀實之居龍原書窟頓
削關西之跡而先生方入侍鸞掖出操麈符不特申嬰
室之謝抑且乏孔席之暝周捨赴官以荻爲障思光東
出居舟非水是則羅君章之蘭宅元貞子之回軒亦可

蓬廬視之逆旅唾之矣然而向子思舊園生多情滄波
一蓋尙奏竿於故巢石牀雙蹠未淹蹤於闌雨憶筱中
九夏之飲締桑下三宿之緣輒未免池夢惠連馨戀光
政繹碧潏瑤翻之句則絳園在前賡莢泝竹里之章則
輞口如見此援成瑞室所以刻鍾嶸之銘而纂題浣花
抑以述端已之志也更有進者先生胸具萬閒之廈而
足繭長梁才同九州之被而心儀環堵缺十住南還之
斧聽士池西潦之聲韋傳則僅賦鬢茅友讓則未謀贖
券以故疏房櫨貌偶托畫禪積金連石未邀仙賚求之

禾作良道卷一
華廡尤所難能澤緯蕭已破靡萍無定邱亭爰止泉廡
暫棲每入白鹿之員莊過青楊之蕭巷輒作十日思焉
何況甘棠五畝緬雅興於謝公竹林別室滂芳年於遵
彥它日樊川墅築淮水齋成賜大官尊賭奇礪石花竹
秀野水木明瑟意將以此圖爲嚆矢乎儻用小文再泚
秃管

陳芝楣觀察傳硯圖記

傳硯圖者吾友芝楣觀察哀其兩世清德鴻筆而以文
之綸附之龍虎變化鸞鵠停峙兒其神也星涵玉李雲

暈久纈肖其器也至於仲興無忝祖德超宗殊有鳳毛
垂元珪之豐髭挺厝犀之異表匪惟繼美實能亢宗而
且青鐵未敝黃丸載波產天人科第之芝博尙書僕射
之號柳誠懸所寶惟研丁公雅傳之其裔古有其事今
乃過之緬惟尊大父成都君惠雨浹於參墟英風被於
井絡祀赫桐鄉神讐羅池宜其五色錦衾之雲覆諸筆
海三躔次月之影落我石屏胸羅手摘逸氣可想尊甫
宜城君學旣博奧書復洞精攜玉帶一角磨盾鼻三斗
而油幕蓮冷廣文璫寒笏甫挂敬亭之雲頭已傾江令

之雪矣雲封凍結有深慨焉至我友芝楣觀察清節內
肅仁風外暄名達華近得元才子之目澤洽州郡接顏
有道之稱吟弄風月則呼泮妃其神講論道惠則置俊
人於側比者乘虹月之舫握英簦之節露夕花午神怡
務閒藏孟公之牘者橐垂索智永之書者柵折結鄰常
御磨穴益深石言若曰是所謂副墨之子雒誦之孫使
龔我若白科亦無悔也夫惟范馨之硯傳之伯孫而孝
行以著端明之硯字於老泉而文祥以顯我友應升卿
之兆傳扶易之經文則檜日撫雲武則飛章草檄是以

忠貞之子復爲司隸清白之後仍生強項之才之望乃
光於家且卿且公無愧於長況復鐵面傳世鳳味有朋
聚之一室比太邱之德星寶之百禩等文貞之棠笏不
特學弓學治溯義門之高蹤抑且如風如錐增硯譜之
嘉話云爾

謝俞陶泉太守餉車螯啓

江干蟣蠃堪供中御之拘酒畔蛤蜊屢折元長之對乃
蒼水元夸之忽至引白中脆尹以偕來自解簪簪欣看
礪礪素膚勝雪比移角而能端紫殼騰花較姑勞而益

厚醢釀寒潮之味，飴新火之光。當齒卽消，點湯欲化。
何如北海醇醴，含不兩之漿。藉甚維揚，甘臙啖二分之
月。豈意破十城之蜃界，致千里之鮭珍。情深安邑之豬
肝，貴壓屬州之蚌醬。僕心慙劉湛議，徇鍾岍北山之隱。
士方饑東海之波，臣難托珠宮新沐。載賡楊萬里之詩，
翠釜初烹。敢拜王泰州之惠，每當充腹。輒切銘肌。

謝祝衡畦同年惠果子狸啓

絲絲繫臂，方當烹鷺之辰。篋絡纏身，忽覩懸貍之狀。喜
君以狸首爲節，使我操牛尾而歌。爲問肌膚，欠雪之凝。

都緣梨栗霜天之飽並頒筍腊以佐肴烝白似截肪與
花豬而競美香能醒酒比竹飴以尤甘弟前處鄉關曾
驗汪龍溪之對茲來京輦又應管公明之占夢殘形以
載興去正脊而猶緩况逢五月重五之日得此八元第
八之才謹當封以糟邱薦諸鶚炙良朋高義深憐鮭食
之貧晝寢朝饑敢報荂肥之帖

謝王都轉餉果狸啓

俎肉已殘方續曾參之操

時汪都樓致果狸已食大半

篋鉤仁解復

賡侯氏之詩三人執牛尾而謂一笑脫貂裘而換肥白

如瓠豈柱下之相君冰雪其肌類藐姑之仙子鸞刀載
削瑤飯初蒸聚空山百果之菁華佐淺酒一樽之風味
膏流饗饜似給事之裏熊肪品極芳鮮等孝儀之夸鹿
尾君從何處致此不來儻搜之鬻霍之旁曷置之糟邱
之側特蒙推食彌切朵頤獲珍有勝于三狐競爽奚慙
于叔豹風林露圃請吟楊萬里之章沙地雪天轉憶洪
容齋之對拜嘉貺賜識愧牂生

賀喜雪啓致陶宮保

禱霧豬泉已覺天慳之破敝銅駝穴彌徵地寶之呈四

民盼五穀之精連日得六花之瑞伏惟宮保制府雲汀
先生時暘時雨已溺已饑文昌之馬才過希逸之衣旋
溼推發粟振裘之意挾纊三軍啓惠禾窠麥之祥賀書
五版鋪來木屑桓公之高會初張掃入茶鐙秀實之清
風可挹縱春旗之簇簇猶臘鼓之鼕鼕下尺而人賀
卽封條其何礙某倦從衰臥嬾藉孫書六朝之山色如
新九陌之車塵不起因憶聚星堂上仙官賡白戰之詩
定知堆麪井邊野老夢黃雲之稼仁嘗甜雪載詠甘謠

謝俞陶泉太守餉蚶啓

暖據竈觚方欲致刳羊之祭

時十二月二十三日

寵頒魁陸幾疑

開駭鹿之山列瓦縫以參差疊錢文而匝匝珍同天嚮
甘號蜜丁一箸探紅湯沸春風之萋雙房釀紫酒淹明
月之光當海天欲雪之時正沙艇烹鮮之日然必溯江
東去始蓄寒苗嶺嶠南馳方登諫草若教寄遠定致役
郵何期淡然子專車而來一似左元放釣鱸之術對茲
璀璨彌切夥頤外形未折夫眉渠內味何虞其齷齪更
自哂者物非混沌人實齷齪芳鮮豈白蝠之遺呀呬類
青郎之嚼比馬甲與章舉君尤嗜南食之奇持羊酪喻

蕤羹我亦守北人之學昔也珍貽若士曾一修化雀之
箋今茲送自右軍並得寶敝蚶之帖血營受益心版堅
鐫是所謂一味之甘必剖而分之百朋之錫方斯蔑如
也

謝汪均之餉鹿尾啓

樂章殘缺方賡狸首之詩

時汪鄴樓兄所惠禮注分明
牛尾狸已食殘矣

復講鹿殘之法何來大尾用佐遨頭爛斑垂蒼玉之綏
圓湛截丹砂之柱旣見珍於鄴下更遙閩乎遼東故因
大惠之休明能致遠方之瑰異操刀未割感君憐爨下

之桐承筐是將引我寢隍中之葉事類拜王公之塵柄
情同餉茂先以龍脩定知卓帳筵開空矜舌醬兼笑采
薇客倦徒飲乳潼角邊之瓊片難餐頂上之珠華比貴
惟丁子之獨有實苜蓿之所無正欲斂醫氏之門廣岐
書而作宴何妨塵太保之閣撫顏帖以裁箋象約同甘
牛心等惠

滄浪來鶴圖記

攝提之歲圉陽之月逸舟先生再權廉訪寓吳門蘇長
史之別館簿領之暇耽耽水石時則雪絮將泣風枝自

鳴昏雅畢逋莫雀噪啐有物飄然降自霄漢元裳縞衣
昂立庭除先生心詫其異目快其潔且恐俄來旋去不
須臾而海天日域矣乃復儀態閒雅不驚不思仰啖俯
啄若習安焉不數日先生有權江寧方伯之信買艇同
載撫翎而還識者謂巢穴測天禽鳥驗氣則夫冠雀栖
宇三台其徵靈鳥滿戟屢擢不次矧髀頰託耳燕膺鳳
翼者貴冠章服舞儀相庭識字含珠尤絕羽類知生祥
下瑞將無已時而某竊以爲一雙入雲非隱弗招二八
集扈非聲不感使子游之門如市元規之塵污人不歌

舞闌咽卽竿牘紛擾唯鶴實智且避之不暇又安望其
擇木而止徭山而歸耶是則能致鶴者先生之抱超乎
俗能調鶴者先生之才餘於官訟庭花落閒階蝶翔可
以想風儀攷政治矣諸君子皆樂道之繪圖繫詩而某
爲識其事

人日游龍樹院詩序

粵以翦人貼帳之日登高賦詩之辰欲作海王村之游
以證輸寥館之事而宵雪嫋嫋朝霧譁譁甚妨東郭之
履無假北闕之步於是簪褰旣集餽歆其閑臺如重壁

有作屑竹之庭麤堆金井彌懷暝寒之徑乃策疲騎聯
高軒徘徊乎鹿王之宮頓憩乎龍樹之宇虛室生白小
窗多明遠眺五陁則擁絮酣臥近瞻萬雉則界墨益顯
重柯者句喬之木疊帶者紆曲之塗掩九秋葦華之影
破蔽空烏羽之墨俄而寒吞落暉醉紅千里清挂弦月
深白一色漏鼓坎坎寺鐘沈沈疏星爍銀斜漢絡玉混
茫天接如泛烟江之濤回旋地空似入水精之域尤可
快者煦春前屈良夜已暄苛謝觥籌笑縱談柄陶陶焉
衍衍焉揚今推古賞奇析疑膏以繼晷不知其劾茶也

嗟乎江關梅信卽在琴尊之南上元鐙火又繞星辰之
北海王村之游新霽少人尙可約焉坐客吳荷屋中丞
工詩善畫許繪一圖蔡友石問卿梅伯言郎中張石舟
大令俱工詩皆有佳什是則幽蘭儷曲各騁妍祕之詞
山陰鼓棹聊乘倏忽之興爰拈拙筆以備引喙道光十
有七年丁酉新正穀日歙程恩澤撰

修篁墩世忠廟啓

古之君子將營宮室必先寢廟吾儕小人皆有闔廬以
避寒暑當春秋之匪懈正霜露之旣濡使勞風上雨之

不支對澡藻賓蘋而有忤此新宮之壑茨與守祧之修
除爲最極者也我世忠廟者賜額於大宋遷基於有明
規撫自程聚而來棟宇在篁墩之上雖蒼楹弗聖儉有
契乎舊章而萌龍更衣葺必勤乎後嗣仰惟我始遷祖
太守公仁能撫眾如朱邑之祀桐鄉我忠壯公武足禦
災若李冰之射江水有功德于民者國家禮亦宜之况
我子孫念厥祖考凡神靈翔泊之所皆寤寐經營之區
必占棟隆之吉而後卽安倘有懷崩之虞其將焉仰嗟
乎服先疇食舊德叨福蔭者一千餘年備鼎俎陳犧牲

薦明禪者四十八派豈無富室傾千金之橐不爲多亦有貧家獻一斗之粟不爲少譬之挾堂上之疾雖刲臂其何辭醫眼前之創縱剜心而弗恤惟願我同族諸尊長諸先生本仁行仁見義集義醲青蚨萬貫得大木百車所見有烏有槌孔曼且碩不礪不石修舊曰新天之所支允矣在高明之室神罔時怨愾然聞歎息之聲謹啓

銘補遺

北極出地四十度加節氣平晷銘

并說 晷畫於團扇

扇平持柄向北肩柄底羸丁出銅表取表插孔
中視表尖影所指在某節綫卽得某時綫某刻
綫蓋節綫與時綫相經緯而南北自正故不用
南鍼

平規置欒識景曠也綫節綫時互經緯也經緯正矣鍼
蠟俚也極出地表表所旣也朔高南下一侯尉也用四
十度丁象魏也蓋實通渾西法彙也統扇寫圓筵且概

也手揮日光時熏颺也

程侍郎遺集卷十

譚瑩玉生覆校

龍泉寺檢書圖記

附錄

歙縣少司農師程公旣卒之明月儀徵相國師阮公約
同人集龍泉寺檢其遺書先一日基以告於公之孤德
威德威泣而言曰先公於辨論經史六書古義及天文
地志札記最夥詩古文詞亦爲之甚勤顧不自存省其
僅未散失者襍置書簾中往往無首尾題識它日從容
整理稍就次第當乞阮公鑒定今苦由迫促未遑也顧
辱公及諸君子存錄之盛心不可以負有戰國策地名
考二十卷遂寫粗畢矣德威斬焉衰絰不敢躬詣明日

將浼宗人鎮北先生持正於阮公同人既集鎮北持書來公披繹久之歎曰疵類有未滌者然既博且精矣聞尙無副墨本余雖欲爲審訂未忍遽攜持去屬鎮北還於其孤且謂曰諸君其急爲校讐使無遺憾余雖老幸及爲覆眎而弁言以行胡肫明禹貢雖指全謝山地理志稽疑後此其盛業矣並其它著作當成大集司農其可以不朽烏乎京師才士之藪魁儒碩生究樸學能文章者輻湊鱗比日至有聞至於網羅六藝貫弗百家又巍然有聲名位業使天下士歸之如星戴斗如水赴海

在於今日惟儀徵及司農兩公而已然儀徵以文章經術受

三朝殊遇敷歷封圻入躋宰輔儒生勲績彪炳人寰司農繼先公蘭翹學士後兩世入直

書房督學典試頻膺使命

嚮用甫殷迄未足以行其志儀徵公所著研經室集十三經校勘記等書手付剗劂又刻宋本十三經注疏皇清經解諸巨冊普惠天下學者司農則詩文各種既未寫定卽此二十卷成書亦未知付梓何日儀徵公久

得末疾曰有歸志承學之士謂京師中儒林祭酒繼儀徵者惟司農乃司農年不中壽偶撓溼疾遽歸道山儀徵公年踰七旬神明不衰且勤勤焉檢其遺書流連而太息之噫資秉之異學術之大精神意量包涵斟酌之闕且遠司農視儀徵亦幾如驂之靳矣信屈殊勢豐嗇殊形脩短異數如是其不相侔也豈非天哉豈非天哉儀徵少年通籍蚤負隆譽由乾隆至道光六十年間海內覃經講學之儒皆其先後所師友或其門下士或其再傳弟子司農之起後二十餘年乾隆時老師宿儒未

及見者已多矣然基久處京師所及交若劉丈申甫潘
丈少白陳丈碩士陳秋舫龔璣人魏默深陳碩甫江鐵
君徐廉宰管異之陳東之徐君青鄭浣香俞理初羅茗
香汪孟慈陳頌南張彥惟許印林張石州沈子敦黃蓉
石諸君大抵皆兩公所識習而矜賞者也基自爲弟子
員出司農之門及成進士改庶常儀徵公實爲館師兩
公居相鄰其與璣人孟慈頌南諸君過從游侍輓跡輒
相屬今司農已矣儀徵旣告歸邗上文選一樓如靈光
魯殿因念基所及交諸君者前後數十輩或旣逝且老

其尙未至於此者或浮沈郎署或畱滯公車或汎濫江湖如有箸述早付殺青天時人事茫茫汗汗知誰爲後死當檢其遺書者哉讀斯圖不禁爲吾師雪涕向天深悲之而復幸之也道州門人何紹基謹記

右程侍郎遺稿十卷 國朝程恩澤撰案侍郎幼承家
學夙荷 主知簪筆木天趨翔廊閣讀書萬卷下筆千
言著撰等身文章名世洵一代龍門也而虛懷友士折
節下交見一善則盱衡扼腕遇一才則揚眉抵掌宜其
望隆山斗獨步當時屢掌文衡翕然相度乃 嚮用方
殷玉樓竟召八百孤寒齊下感恩之涕矣文兼燕許之
長而凝重學柳詩擅杜韓之勝而豪宕似蘇亦中朝之
宿老而曠代逸材也集經張石州明經編輯欲不遺一
字故失題及不完之作並采以待後來補入也余夙喜

侍郎之詩舊從友人錄得廿餘首未見集中今擬重付
剞劂並編入焉而失題及不完之作則概從芟薙以待
後來至律賦及試帖詩多已刻於同館賦鈔詩鈔者未
免綴旒似可不存也明經序稱其精神所到卓絕岸異
必然可傳於後者則其有韻之詩文也殆非過爲推挹
之言又稱其自言吾詩險而不夷能飛揚而不能黯淡
亦可謂得失寸心知者矣阮氏瀛舟筆談稱其詩翛然
遠俗清介可風寒江云月從京口白天入海門青錦瑟
云綠尊槐葉竈紅袖棗花簾寒山云石根齊到地風力

自生潮趙北口云魚聲在水都成雨帆影依天欲化雲
又云傍柳人家春放鴨落花時節女湔裙詩多不見集
中則其遺佚者不少矣明經又疑其尙有清本藏之別
筭何迄今未見也噫可慨已咸豐乙卯花朝後四日清
明南海伍崇曜謹跋